



Sumariu kona-ba Liña Orientasaun Política Sobre Desentralizasaun no Governo Lokál

Governo Hahú Prosesu Desentralizasaun

Komesa iha 2003, Governo hahú Estudu kona-ba Opsaun ba Governasaun Lokál no pilotu ba governasaun lokál, Programa Dezenvolvimentu Lokál. Lisaun ne'ebé mai husi serbisu tékniku ne'e kontribui ba desizaun ne'ebé Governo foti hodi prepara liña orientasaun ba desentralizasaun no governo lokál. Liña orientasaun sei aplika ba departamentu hotu nia serbisu hodi hakerek ezbosu política kona-ba oinsá atu desentraliza setor ida-idak, fiskalizasaun, no reprezentasaun lokál.

Matadalan Política 2006

Iha 2006 Konsellu Ministrus aprova Resolusaun kona-ba prosesu desentralizasaun hodi komesa estuda iha Ministerio ida-idak kona-ba opsaun ba prosesu desentralizasaun. Iha Política 2006, Governo konsidera opsaun kona-ba divizaun administrative no territorial no hanoin atu halakon tiha Distritu no forma munisípiu 31-34 husi sub-distritu 65 ne'ebé eziste. Tuir prinsípiu báziku ne'ebé tau iha liña orientasaun, Ministerio da Administração Estatal e Ordenamento do Território (MAEOT) koordena Governo nia serbisu hodi analiza opsaun tékniku ba ezbosu proposta lei.

Matadalan Política Foun iha 2008

Iha 12 Marsu 2008 Konsellu Ministrus foin aprova política matadalan foun kona-ba desentralizasaun no governo lokál hodi haree fila fali política husi 2006. Política matadalan foun konsidera opsaun atu estabelese Munisípiu iha nivel distritu. Prosesu desentralizasaun sei neineik-neineik muda responsabilidade balun ne'ebé agora daudaun Governo Sentrál kaer, maibé tuir planu sei entrega ba Governo Lokál iha nivel ida de'it, hanaran Munisípiu. Munisípiu sei serbisu hamutuk ho Governo Sentrál atu hala'o Governo nia serbisu, maibé mós sei iha podér rasik no hola desizaun rasik.

Política ida ne'e fô liña orientasaun ba Governo hodi prepara proposta lei rua: proposta de lei kona-ba Divisão Administrativa e Territorial no proposta de lei kona-ba Governo Lokál. Governo sei prepara proposta de leis e so Parlamentu Nasionál maka instituisaun ne'ebé maka bele aprova lei rua ne'ebé refere.

Strutura

Matadalan política mós hatete katak Governo sei konsidera opsaun kona-ba strutura Governo Lokal aban-bainrua. Kada munisípiu sei iha Assembleia ida no Administrasaun Munisípiu ida no Setor Departamentu. Assembleia Munisipal funsiona hanesan órgaun lejizlativa lokál, ho podér atu aprova orsamentu, aprova política lokál, no haree jestaun ba prestasaun serbisu munisípiu nian iha nivel lokál.

Munisípiu sei iha Administrasaun Munisípiu, kompostu husi funcionáriu ne'ebé serbisu hodi ezejuta desizaun ne'ebé Assembleia foti. Iha Munisípiu sei iha Prezidente Kámara ida ne'ebé responsabiliza ba Administrasaun Munisípiu no Setor Departamentu Lokál, no mós Assembleia sei eleita Porta Voz hodi jere enkontru Assembleia. Setor Departamentu, ne'ebé tuir Ministériu ida-idak nia política, sei hetan supervisaun husi nivel Munisípiu no mós nivel sentrál wainhira prosesu desentralizasaun hahú, maibé karik aban-bainrua sei hetan supervisaun husi nivel Munisípiu rasik.

Política kona-ba desentralizasaun no governo lokál maka liña orientasaun de'it ba Governo, no la signifika katak struktura final sei tuir política ne'e, tanba desizaun final sei mai husi Parlamentu Nasionál.

Husu no Hatan

kona-ba

Liña Orientasaun Polítika Sobre

Desentralizasaun no Governo Lokál

Governo Hanoin atu Harii Munisípiu iha Nivel ida Ne'ebé?

Iha nivel distritu.

Saida maka sei akontese ho nivel Sub-Distritu?

Adminsitrazaun Sub-Distritu sei reforma ba unidade prestadora iha munisípiu nia okos hodi suporta serbisu munisípiu nian.

Oinsá atu Eleita Membrus Assembleia?

Iha polítika, seidauk define se eleisaun ba membru Assembleia sei halo iha maneira direta (komunidade tomak vota hodi hili representante munisípiu) ka indiretu (representasaun husi Konsellu Sucos). Prezidente Kámara no Porta Voz sei eleita indireta husi membru Assembleia.

Munisípiu sei iha Responsabilidade Saida?

Durante prosesu konsultasaun ba proposta lei, Ministériu husi nivel sentráal ida-idak sei diskute kona-ba serbisu saida maka di'ak liu atu entrega ba nivel munisípiu.

Oinsá ligasaun Munisípiu ho Suco?

Munisípiu mós sei koordena ho Konsellu Suco, hanesan autoridade komunitaria, hodi tau matan ba jestaun fundus suco nian, no inklui mós autoridade komunitaria iha prosesu planeamentu ba orsamentu munisípiu nian.

Bainhira maka reforma desentralizasaun sei hahú?

Goevrno iha objetivu atu aselera prosesu reforma desentralizasaun hodi hahú iha 2009, no karik atu halo eleisaun iha tinan hanesan. Maibé prosesu reforma depende ba aprovasaun lei rua iha 2008, no Parlamentu Nasionál maka instituisaun ne'ebé maka bele aprova lei rua ne'ebé refere.

Nivel Munisípiu ne'e sei iha kapasidade natoon hodi halo sira nia serbisu?

Reforma desentralizasaun sei hala'o neineik, no responsabilidade balun sei entrega ba nivel lokal uluk molok responsabilidade tomak, hanesan faze impementasaun, hodi asegura katak Munisípiu iha kapasidade natoon hodi halo responsabilidade ne'ebé sira iha.

Orsamentu Munisípiu nian mai husi ne'ebé?

Hodi hahú prosesu desentralizasaun, orsamentu sei mai husi Governo Sentráal, ne'ebé aloka orsamentu ba Munisípiu hodi hala'o sira nia atividade. Munisípiu sei karik, aban-bainrúa, simu diretu hodi halibur no uza impostu husi sira nia territóriu.

Desentralizasaun sei afeta ha'u nia moris oinsá?

Desentralizasaun sei hala'o atu habesik serbisu Governo nian ba povu. Ho reforma desentralizasaun, comunidade bele husu kona-ba nesesidade direktamente husi sira nia Governo Lokál, no lalika ba iha nivel sentráal. Hanesan ne'e, comunidade bele haree saida maka Governo halo, komesa partisipa iha Governo Lokál nia atividade, no ajuda Governo Lokál hodi sai efetivu liu.